



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Dili
18 Fevereiru 2016

Tribunál sira kontinua aplika dever adisionál apresentasaun periódiku ba arguidu sira iha krime ho natureza violénsia doméstika

Tribunál sira kontinua aplika dever adisionál ka orden auxiliar apresentasaun periódiku ho durasaun tempu konsiderável ba krime ofensa ba integridade fízika simples ho natureza violénsia doméstika.

JSMP apresia mudansa pozitivu sira iha tribunál atu utiliza provizaun sira kona-ba dever adisionál ho efektivu iha tribunál ba kazu krime ho natureza violénsia doméstika hanesan rekomendasaun JSMP nian durante ne'e. Antes ne'e, JSMP ho konsistente rekomena ba tribunál sira atu aplika dever adisional wainhira atu subsitui pena prizaun ho suspensaun ka pena multa.

“JSMP konsidera sentensa ho forma hirak ne'e nu'udar progresu signikativu iha prosesu oinsá asegura arguidu sira la repete sira nia hahalok iha futuru, liu-liu iha kazu sira ho natureza violénsia doméstika. JSMP fiar katak ho atribuisaun dever adisional hirak ne'e, sei produz efektu prevensaun ba kazu hirak ne'e tanba kondenadu sira sente katak iha duni desizaun ruma ne'ebé impoin ba sira atu kumpri,” dehan Diretór Ezekutivu JSMP, Luis de Oliveira Sampaio.

Iha Kódigu Penál no Lei Kontra Violénsia Doméstika (LKVD), hatur mekanizmu sira kona-ba dever adisional sira mak inklui apresenta-aan ba iha entidade relevantes (artigu 70 (1) letra (g) Kódigu Penál) hetan monitorizasaun durante tempu suspensaun (artigu 71 Kódigu Penál), hetan tratamentu no akompañamentu hosi servisu apoiu ba vítima (artigu 38 (1) hosi Lei Kontra Violénsia Doméstika (LKVD), bandu kondenadu kontaktu ho vítima masímu tinan 3 (artigu 38 alenea 2 LKVD) no obrigasaun atu fó alimentasaun ba vítima (artigu 29 LKVD).¹

Iha 09 Fevereiru 2016, Tribunál Distritál Dili kondena arguidu FMG ho pena prizaun tinan 1

¹ Relatóriu temátiku JSMP nian ho titulu : [Aplikasaun sentensa alternativa iha kazu violénsia doméstika iha Tribunál Distritál Oe-cusse-2015](#), pajina 2. Asesu iha www.jsmp.tl

suspende ba tinan 2 no kondena mós arguidu ho dever adisional obrigasaun ba apresentasaun periodika fulan 1 dala 2 iha semana primeiru no semana ikus iha tribunál, tanba provadu komete krime ofensa ba integridade fízika simples hasoru nia feen iha 14 Setembru 2014, iha Distritu Likísa.

Antes ne'e, iha 5 Feveireiru 2016, Tribunál Distritál Dili kondena arguidu AC ho pena prizaun tinan 3 suspende ba tinan 3. Tribunál mós aplika dever adisional hodi haruka arguidu apresentaan ba tribunál kada fulan dala 1 durante periódu fulan 6, nomós selu indemnizasaun sivíl US\$ 250.00 ba lezada².

Tuir-mai, nafatin iha laron hanesan, 05 Feveireiru 2016, Tribunál Distritál Dili mós kondena arguidu GS ho pena prizaun tinan 1 fulan 6 suspenda ba tinan 3, no apresenta-aan dala 1 kada fulan iha tribunál durante periódu suspensaun, tanba arguidu prátika krime violénsia doméstika hasoru nia feen³.

Nune'e mós, iha 04 Feveireiru 2016, Tribunál Distritál Dili kondena arguidu LS ho pena prizaun fulan 6 suspende tinan 1 inklui aplika dever adisional seluk obrigasaun ba apresentasaun periódika fulan 1 dala 2 iha tribunál durante periódu suspensaun laran. Tribunál prova katak arguidu komete krime ofensa ba integridade fízika simples hasoru nia feen. Kazu ne'e akontese iha 07 Outubru 2015, iha Distritu Dili.

Iha parte seluk, iha laron ne'ebé hanesan, 04 Feveireiru 2016, Tribunál Distritál Baucau mós kondena arguidu AC ho pena prizaun fulan 2 suspende ba tinan 1 no selu kustu judisiál US\$ 10.00. Tribunál mós aplika dever adisional, apresentasaun periódiku iha tribunál kada fulan iha laron Sesta-feira durante fulan tolu nia laran. Tribunál prova katak arguidu komete krime ofensa ba integridade fízika simples hasoru nia feen, iha 02 Outubru 2013, iha Distritu Baucau.

Mesmu observa no kongratula mudansa hirak ne'e, JSMP nafatin rekomenda ba tribunál sira atu konsidera hodi, dezenvolve matadalan ba sentensa iha kazu violénsia doméstika atu ajuda tribunál sira identifika pena no medidas protesaun sira ne'ebé apropriadu tuir prinsipiu rekerimentu sira iha Kódigu Penál no LKVD.

JSMP fiar katak mata-dalan ne'e sei responde ba kompleksidade hosi sentensa sira iha kazu violénsia doméstika no sei ajuda juis sira atu determina pena apropriadu iha kada kazu.

Atu hetan informasaun klean, favor kontaktu:

Luis de Oliveira Sampaio

² Komunikadu Imprensa JSMP: Tribunál suspende pena prizaun no apresentasaun periódika ba rguidu no selu mós indemnizasaun sivíl ba lezada-11-Feveireiru-2016

³ Komunikadu Imprensa JSMP: Tribunál suspende pena prizaun ho dever apresentasaun periódika ba tribunál iha periódu suspensaun- 11-Feveireiru-2016

Diretór Ezekutivu JSMP

Diresaun e-mail: luis@jsmp.minihub.org